

H

1617.

3971

225-

LE  
PRINCE  
ABSOLV.

g

A PARIS;

---

M. DC. XVII.


THE  
PRINCE  
ABSOLOUT

A. B. A. A.

1800



# AVROY.



I R E,

Encore que vostre Majesté peust dire du feu Roy d'immortelle memoire, ce que l'Empereur Tybere disoit d'Auguste, « qu'il n'y auoit que sō seul esprit qui « fust capable d'un faix si pesāt, qu'est « celui du gouuernemēt de la Repu- « blique: Si est-ce que la France vous « voyant aujourd'huy le Sceptre à la main, ose esperer que vous ne serez pas moins heritier des rares vertus d'un si bon Pere, que vous estes legitime successeur de ses Couron-

nes, & que si les Payens adoroient le Soleil des laube du iour, comme vne Deité imaginée de laquelle ils attendoient tout leur bon - heur : Nous pouuons à plus iuste sujet, & sans soupçon d'idolatrie, jeter nos yeux sur vostre Majesté, comme sur vn Astre naissant, duquel nous auons à receuoir l'influence d'une continuelle prosperité. Car puis que les peuples prennent du Prince, comme d'un moule public, la forme de toutes leurs actions, changeans & rechangeans leurs mœurs avec les siennes, vous nous ferez vn exemple si parfait, que semblable à vos predecesseurs, vous porterez les tiltres glorieux, DE CONQVE-  
RANT, DE SAGE, DE GRAND,  
DE DEBONNAIRE, ET DE  
PERE DV PEUPLE. Tiltres vrayement heroïques, & qui immortalis-

sent le nom de ceux qui en ont esté honorez : Mais le vray caractere qui fait discerner vostre Majesté d'entre tous les Roys de la terre, & qui fait que vous les surpassez en grandeur, est le tiltre sacro-sainct de ROY TRES-CHESTIEN, acquis à vos Ayeulx, pour leur zele incomparable enuers la Religion. C'est pourquoy, SIRE, marchant sur leurs pas, nous verrons en nos jours fleurir si heureusement la Pieté sous la douceur de vostre Empire, que la France sera comme vn Temple sacré où le seruice de Dieu se maintiendra en son ancienne pureté. A cét effect vous sçaurez par vostre prudence, faire tousiours vne telle élection des Prelats de l'Eglise, qu'ils se rendront autant venerables par l'innocence de leur vic, que par l'eminence de leur

ſçauoir, ſans ſouffrir que les ignares, non plus que les vicieux, s'approchent de l'Autel, & poluënt les choſes ſainctes. Car ne doutez point, SIRE, que les Princes n'ayent à reſpondre au iugement de Dieu, du mauuais exemple, & des ſcandalles que les Paſteurs donnent à leurs troupeaux. Apres les auoir donc choiſis à la marque de leur merite, & probité, vous leurs ſçaurez rendre la reuerence qui eſt deuë à leur Onction, ce reſpect ne ſe rapportant pas ſeulement à leurs perſonnes, mais au Roy des Roys, duquel ils ont l'honneur d'eſtre Miniſtres. Ainſi vos predeceſſeurs, dont l'hiſtoire celebre la pieté, ont grandement deferé à cét Ordre, voire iuſqu'à l'honorer quelquesfois de la Regence du Royaume, ſans ſe figurer qu'en cela leur Majeſté fuſt di-

minuée, ains ils estimoient que les graces du Ciel en découloient sur leur chef, avec la benediction & bien-vueillâce vniuerselle des peuples, lesquels croyent aussi ne pouoir jamais receuoir rien d'injuste ny d'insupportable d'un Prince religieux. Pourtant, SIRE, vous n'estimerez point pecher en l'excez du respect que vous defererez à des personnes de ceste qualité, puis qu'il n'y a à redouter en eux aucun establissement temporel, parce qu'ils ne se reuestant que de ce qu'il plaist au Prince de leur attribuer par sa pieté, sans qu'ils l'vsurpent par aucune ambition. Ioint que tout ce lustre externe s'esteint en leurs personnes, & n'est suiuy d'aucun de leurs maisons qui le releue apres eux. Anciennement (dit l'histori-

*Le sieur de  
Tillet.*

re) en toutes chartres & tiltres des “

» Roys, l'addresse estoit aux Prelats,  
» puis aux Ducs, Contes & autres, &  
» la souscription premiere d'iceux,  
» aux Prelats : Mesme au Sacre &  
» Couronnement du Roy Philippe  
» premier, les Prelats approuuerent  
» ledit Roy les premiers, qui estoit la  
» façon du temps, & sont nommez  
» auant les Laics. En celuy du Roy  
» Louys onzième, les Pairs d'Eglise, &  
» autres Prelats, precederent les Pairs,  
» Laics, & autres Princes, Ducs, Con-  
» tes & Seigneurs, & furent en l'Egli-  
» se audit acte, & au disner assis à la  
» dextre du Roy, les Pairs & autres  
» Laics à la fenestre, & a esté ainsi ob-  
» serué à tous les autres Sacres & Cou-  
» ronnemens desdits Roys. La mes-  
me histoire parlât aussi de la seance  
des Prelats aux Estats generaux du  
» Royaume, remarque, qu'en ceux de  
» Tours par ledit Roy Louys onzié-  
me

me le Cardinal Baluë fut assis au  
costé droit du Roy, sur vne chaire  
couuerte de drap d'or sur velour  
cramoisy, les autres Prelats de mes-  
me costé: Et sur autre chaire sem-  
blable, au costé gauche fut assis le  
Roy René de Cysille, Duc d'An-  
jou Prince du sang, & dudict costé  
les autres Princes, Ducs, Contes &  
Seigneurs Laics. Elle ajouste enco-  
res, que l'année 1377. l'Archeuesque  
de Rheims, vn Euesque d'Allema-  
gne Châcelier de l'Empereur Char-  
les quatriéme, & l'Euesque de Pa-  
ris, furent en vn disner assis, au des-  
sus de l'Empereur, du Roy Charles  
cinquiéme, & du Roy des Romains  
fils de l'Empereur: Mesmement, à  
l'entrée du Roy Henry second, les  
Princes plus proches de la Couron-  
ne Laics querelloient pours'asseoir  
à la dextre du Roy, voulans que les

» Princes du sang d'Eglise fussent à la  
» fenestre, ledict Roy honora l'Eglise  
» de sa dextre. De sorte, SIRE, que  
vos predecesseurs, selon le plus ou  
moins de leur zele enuers l'Eglise,  
ont donné rang aux Ecclesiastiques,  
ceste reuerence ayant tant seruy à  
leur reputation, & à l'heureux gou-  
uernement de leur Royaume, que  
les Prelats demeurans ainsi en rang  
id. eminent, estoient comme interpo-  
sez entre les Roys & les Grands de  
l'Estat, pour les contenir en leur  
deuoir, & les y attacher par les liens  
de la conscience, liens beaucoup  
plus forts que n'est la terreur de  
toutes les loix humaines. Ce que  
j'en represente à vostre Majesté, est  
plus pour luy faire admirer la gran-  
de deuotion de ses Peres, que pour  
l'induire à redresser ces anciens de-  
grez d'honneur en faueur des Pre-

lats de ce temps, estimant que leur modestie & humilité est telle, que pourueu que Dieu ne soit mesprisé en eux, & que les ennemis de l'Eglise ne s'en orgueillissent de leur rebut, ils n'auront jamais ambition d'estre plus honorez dans le monde qu'ils sont.

Vostre Majesté ayant donc esté si soigneusement esleuée en son bas aage, qu'elle a succé la pieté avec le laict, elle craindra Dieu toute sa vie, & l'aymera de toute son ame, parce que c'est ce seul grand Dieu qui allonge & accourcit comme il luy plaist la vie des Roys, & qui tenant leur cœur en ses mains, l'encline où il veut. Et si avec le tiltre de R O Y TRES-CHRESTIEN, vostre Majesté s'honore encore de celuy de FILS AISNE' DE L'EGLISE, elle témoignera par toute sorte de sub-

mission, l'obeissance qu'elle doit au Chef visible de ceste Espouse, jet- tant humblement son Sceptre & sa Couronne aux pieds de la Croix du fils de Dieu, que ce souuerain-Pasteur represente icy bas en terre. Les Constantins, les Theodoses, vn Clouis, vn Charlemagne, & les autres Roys vos deuanciers vous ont laissé assez d'exemples de leur deuotion enuers le sainct Siege; pour vous animer, SIRE, à ne leur ceder en ce deuoir. Partant si en nostre siecle corrompu il y a des esprits chagrins & contentieux, qui ayans la voix de Iacob, & les mains d'Esai, sement des discours au defauantage de la reuerence deuë au vray successeur du Prince des Apostres, pour le mettre en ombrage aux Souuerains, & Potentats, vous sçaurez, SIRE, boucher vos oreil-

les au sifflement de telles viperes, sans apprehender que ce Pere commun de la Chrestienté, entreprenne jamais chose qui preiudicie au pouuoir absolu de vostre Majesté. Car outre ce que luy, & tout le Clergé de France prononce anatheme & damnation eternelle, à tous scelerats & parricides qui osent attenter à la sacrée personne des Roys, ils sçauent que vous estes Souuerain de toutes sorte de Souueraineté temporelle en vostre Royaume, n'estant feudataire, ny du Pape, ny d'aucun autre Prince; & qu'en l'administration des choses temporelles, vous dependez immediatement de Dieu, & ne recognoissez aucune puissance par dessus vous, que la sienne: Mais si du Tribunal de l'Eglise, comme d'un Arsenal spirituel, ce grand Pontife lance quel-

quesfois des foudres cōtre les Princes heretiques, & persecuteurs de la Religion Catholiquē : vostre Majesté n'a pas à les craindre, parce que vous estes heritier de la Couronne, & du nom, & de la foy de ce glorieux S. Louys, qui estoit l'appuy de l'Eglise & l'abry & la retraicte des Papes. C'est pourquoy, SIRE, vous estes inseparable & indiuisible de l'vnion & de l'amitié du Siege Apostolique, & conuié par toutes raisons, & spirituelles & temporelles de la maintenir. Aussi le Pape Paul qui sied aujourd'huy, estant Parrain de vostre Majesté, & comme son second Pere, s'employe par toutes sortes de soins & d'offices, à procurer enuers Dieu & les hommes, le bien & la conseruation de vostre persōne & de vostre Royau-me. Bref, SIRE, souuenez-vous,

(ainfi que l'a tres-elegamment écrit,  
vne des grandes Lumieres de l'Egli-  
fe) que comme quand l'Arche de  
l'alliance refidoit en la maifon Do-  
reb-Edon, il n'y auoit efpece de fe-  
licité qui ne luy arriuaft: Ainfi pen-  
dant que la communion du Siege  
Apostolique a esté parmy nous, &  
que nous auons eu l'affiftance du  
Vicaire de celuy qui eft la vraye Ar-  
che d'alliance, toutes fortes de pro-  
fperitez nous font arriuées. Le nom  
François s'est efpandu d'un bout du  
monde à l'autre, & nos lys ont fleu-  
ry aux plus loingtaines parties de la  
terre. Et au contraire, lors que nos  
Roys ont esté feparez de l'vnion du  
Siege Apostolique, le lys a esté en-  
tre les efpires, & toutes fortes d'an-  
goiffes & d'aduerfitez nous ont af-  
fiegés. Les Palais appartenans donc  
aux Roys, & les Temples & les Au-

tels aux Prelats, vous tiendrez lieu d'ouïaille en l'Eglise, & non de Pasteur; prenant l'encensoir à la main, & vsurpant l'autorité de la Religion, comme vn Roy Ozias qui fut frappé de lepre pour ce sacrilege. Vous desirerez seulement que vos peuples vous rendent ce qui appartient à Cefar, sans vous donner ce qu'ils doiuent à Dieu. Nous deuons

*In Matt.  
cap. 25.*

beaucoup (dit vn genereux Athlete de la Foy) au Roy estably sur nous de l'ordōnance de Dieu: Mais nous ne luy deuons rien que nous ne deuions à Dieu, duquel il est Lieutenant, & nous deuons beaucoup de choses à Dieu, que nous ne deuons pas au Roy. Nostre deuoir enuers le Roy est borné, & enuers Dieu nostre deuoir n'est jamais acheué. Au Roy nous deuons beaucoup, à Dieu nous deuons tout.

Or,

Or, SIRE, dautant qu'apres le  
vray culte de la Religion, & la reue-  
rence deuë à vos Peres spirituels,  
l'honneur & le respect qu'un Prince  
Chrestien doit à ses Parents, est en-  
cores vne des marques principales  
d'une parfaite pieté, la France a su-  
jet de s'esioüyr & de vous benir de  
la tendre & cordiale amitié que  
vous auez tousiours témoignée à la  
Reyne vostre Mere, à laquelle ou-  
tre la naissance, vous vous ressentez  
estroitement obligé du soing par-  
ticulier que ceste grande Princesse a  
tousiours eu de vostre personne, &  
de vostre Estat, l'ayant si bien regy  
durant vostre Minorité, qu'elle se  
peut glorifier qu'il ne s'est jamais  
passé Regence plus heureusement  
que la sienne, ce Royaume durant  
ce temps-là n'ayant esté troublé,  
ny agité d'aucunes guerres ciuiles.

C'est pourquoy on luy peut justement attribuer la mesme loüange que Phocion se donnoit, d'auoir si bien conduit sa Republique, que durât son administration les Athéniens n'auoient eu autres sepultures que celles de leurs Peres, tant ceste sage Princesse sceut obliger vos sujets par toutes sortes de liberalitez, pour les contenir en deuoir apres le deplorable decez DV GRAND HENRY vostre Pere, ainsi que les Estats generaux luy rémoignerēt par les eloges & actions de graces, dont ils loüerent & celebrerent son gouuernement à l'entrée & à la closture de leur Assemblée. Depuis, le mal-heur a esté pour elle & pour toute la France, que Tels qui deuoient se cognoistre & n'abuser de la felicité de leur fortune, se sont neantmoins

ingratement & insolemmēt com-  
portez enuers elle, se rendans indi-  
gnes des graces, des honneurs, &  
des biens-faits dont elle les auoit  
comblez. Surquoy vostre Majesté  
la remerciant de ses labeurs passez,  
a eu pour agreable qu'elle se re-  
pose maintenant en sa solitude, où  
receuant tout le gracieux & fauo-  
rable traictement qu'un fils bien né  
doit à vne Mere si vertueuse, elle  
prie Dieu incessamment pour vo-  
stre prosperité, pour la paix & gran-  
deur de vostre Estat. Tres-marie  
qu'elle est de ne vous l'auoir rendu  
plus florissant, ce qu'il y a à desirer  
estant plustost arriué par l'arti-  
fice & par l'illusion d'autrui, que  
non point par mauuaise inten-  
tion qu'elle ayt jamais eüe enuers  
ce Royaume, la candeur & sence-  
rité de ses actions estant cogneuë

de Dieu & des hommes vuydes  
de passion.

*au Present  
royal. 2.  
part.*

Finalemēt, SIRE, vſant du pro-  
pre langage du Sereniſſime Roy de  
la grande Bretagne, au feu Prince  
de Galles ſon fils, je diray à voſtre  
„ Majeſté, que puis qu'elle a l'autho-  
„ rité de Magiſtrat legitime, elle ne  
„ ſouffrira point que ceux deſquels  
„ elle a l'honneur d'eſtre yſſuë, & qui  
„ auront eu puiffance & authorité ſur  
„ elle, ſoient calomniez par qui que  
„ ce ſoit, meſmément puis que le fait  
„ vous touche auſſi en particulier,  
„ pour ne laiſſer à ceux qui viendront  
„ apres vous, ſujet de vous traiter à la  
„ meſme meſure que vous aurez me-  
„ ſuré les autres.

Dauantage, SIRE, la perſonne  
de MONSIEVR, qui eſt comme  
le bras droit de voſtre Majeſté,  
eſtant ſi dignement eſleuée pour ſe

rendre capable de la seruir vn jour, aura en vous vn second Pere pour le proteger, comme vous fairesz aussi Mesdames, & les Princes de vostre sang, afin qu'accomplissant ainsi les commandemens de Dieu en leur premiere & seconde table, vous cueilliez abondamment le fruiet des promesses spirituelles & temporelles, faictes à ceux qui les obseruent religieusement.

Encores, SIRE, qu'il fust à desirer pour la gloire de Dieu, que vos peuples fissent profession d'une mesme Religion, & qu'ils adorassent tous sous la voûte d'un mesme Temple, parce que là où la diuine Majesté est diuersement seruie, celle des Roys qui en est l'image viuante, est tant moins craincte & reuerée : Si est-ce que puis qu'il a pleu à

vos predecesseurs de leur permettre par leurs Edits, la liberté de conscience, vostre Majesté la leur maintiendra inuiolablement, sans souffrir qu'on en altere la grace & le benefice. Si bien que les traictant esgalement sans aucune distinction d'eux aux Catholiques, puis qu'ils sont tous vos sujets, ils participeront aux charges & honneurs du Royaume, les faueurs particulieres de vostre Majesté ne leur estant mesme déniées, tant qu'ils s'en rendront dignes par leur fidelité & affection au bien de l'Estat : Mais s'il y a entr'eux quelques esprits turbulens, qui non contens des grands avantages qui leur sont concedes par les Edits de pacification, notamment par celuy du feu Roy vostre Pere, ils vouloient innouer & se porter à des demandes & preten-

sions excessiues , ou visiblement preiudiciables à la Religiõ Catholique, & à l'autorité Royale, vostre Majesté les sçaura lors renfermer dans leurs justes limites, & leur faire sentir qu'estant apres Dieu l'vnique protecteur de la Cause de l'Eglise, vous la garantirez de leur oppression , comme aussi vostre Royaume de toutes les semences d'vne miserable Anarchie, lesquelles n'estans estouffées à leur naissance, montent quelquefois à vn si haut degré de rebellion & de desobeyssance , qu'elles desolent les plus puissantes Monarchies.

Vostre trône ayant donc la Pieté pour principal appuy vous regnerez vraiment en Prince absolu, parce que vos commandemens ayant la Loy de Dieu pour regle souueraine , seront accomplis

avec tant d'obeissance, que l'enfant debonnaire ne ploye pas plustost à la volonté du Pere que vous ferez crainct, seruy & honoré d'un chacun, vous souuenant sur tout, que les Rois doiuent tousiours estre plus religieux que leurs subjects. Car ils ont beaucoup plus d'allechemens de pecher que nō pas eux; n'estans punis des hommes, mais de Dieu seul. Ioinct qu'ils pechent autant par l'exemple qu'ils donnent, que par le mal qu'ils font: Mais d'autant qu'avec la Pieté, la Iustice est la seconde colomne qui soustient les Monarchies, vostre Majesté la fera soigneusement administrer à ses peuples, leur donnant des Magistrats qui soyent gents de science & de conscience, qui oyent les cris de l'orphelin, & ayent commiseration des larmes de la vefue.

Tels

Tels vostre Majesté les sçaura choisir, quand elle aimera la Iustice, & aura souuent à la bouche ceste sentence qui est plus pure que l'or fin. Encores que je puisse tout, si n'y a-il que les choses justes qui me soient permises. En quoy vous imitez ce Grand Monarque, à qui vn Courtisan vouloit persuader, que tout estoit juste aux Roys: Ouy biẽ, (luy respondit-il) aux Roys des Barbares. Aimant ainsi l'equité & la droicteure, elle abondera en vostre maison, & de ceste source les ruisseaux s'en épandront jusques aux extremittez du Royaume. Le Magistrat sera aussi tant plus authorisé enuers vos Peuples, quand vous l'honorerez & armerez son bras pour le rendre formidable aux mechans, vos Cours souueraines estans principalement establies pour pro-

teger les innocens , & pour venger leurs iniures contre tous ceux qui les oppriment. Pourtant , SIRE, ces celebres Compagnies-la auront en vostre Majesté vn tel soustien & appuy , que fortifiées toujours plus de vostre autorité, elles feront autant de rempars inexpugnables pour la defense de la Religion & de l'Estat. Or dautant que la venalité des Offices est vne breche par où il entre beaucoup de mal au Royaume , vous en corrigerez l'abus tout autant que vos affaires le pourront permettre. Car qui achete en gros peut estre tenté de vendre en detail. C'est ce qui porte quelquefois le Financier au larcin, le Iusticier à la corruption des presens, & le Guerrier à la violence & à l'exaction. Ce seroit aussi chose bien plus louable de rendre l'honneur &

le pris à la vertu , auanceant aux charges & offices ceux qui n'ont autre degré pour y monter que leur seul merite.

La Clemence, SIRE, vous fera pour interprete de la Loy, & retiendra en l'air le glaiue de la Iustice. Il a tué dit la Loy. Il l'a fait son corps defendant & sans y penser dira la Clemence , ou bien il a tué celuy qui auoit mis à mort son propre Pere, ou quelcun de son sang: Mais sous couuerture de Clemence , vostre Majesté ne fera jamais vne iniustice, elle ne luy seruira point de masque, elle ne luy prestera jamais sa robe à si mauuaise fin. En pensant à la douleur & au supplice d'un particulier, vous peserez l'interest public , & la consequence de l'impunité. Car il est autant abominable deuant Dieu d'absoudre le meschant que de pu-

nir l'innocent : & le Prince , ( disoit  
„le sage Emile), qui ne reprime point  
„le mal , semble le commander luy-  
mesme. Viuant ainsi vostre Estat  
sera grandement heureux , les Ro-  
mains n'ayans jamais acquis l'Empi-  
re du monde , que parce qu'ils sa-  
crifioient souuent en leurs Tem-  
ples , & estoient grands zelateurs de  
la Iustice , selon la louange que leur  
en donnoit l'Empereur Seuere , le  
premier leur rendant les Dieux pro-  
„pices , & le second conseruant leurs  
„Peuples en amitié & subiection.  
„C'est pourquoy le valeureux Roy  
Clouis qui embrassa le Christianif-  
me , s'enquerant de saint Remy,  
duquel il receut le Baptesme , com-  
bien dureroit ceste Monarchie ,  
tout autant de temps , (répondit-il)  
„que la Religion & la Iustice y fleuri-  
„ront , parce qu'en tout Estat où le

crime est pardonné voire recom-  
pensé, & où l'on ne delibere point  
si l'honneur de Dieu y est conser-  
ué ou non, il n'en faut attendre  
qu'une horrible subuersion.

Et dautant, SIRE, que les Roys  
ne regnent par la seule force des  
bras, mais avec la prudence & sagesse  
de l'entendement, vostre Majesté  
aura toujours pres d'elle de bons &  
fidelles Conseillers qui aiment la  
grandeur du Royaume, qui en  
espousent genereusemēt la defense,  
& qui n'estans toucheez d'autre inte-  
rest, ny meus d'autre passion que du  
bien public, vos subjets reposent  
sous leurs veilles, & l'Estat reçoive  
une si profonde paix, que comme  
ceux qui auoient vescu sous l'Em-  
pire d'Auguste se reputoient heu-  
reux, qu'aussi vostre regne nous  
comble d'une telle felicité, qu'il

puisse estre non seulement comparé au plus tranquille siecle d'aucun de vos predecesseurs , mais qu'il le surmonte en toute sorte de prosperité. Et si vne Republique est plus asseurée là où le Prince est mauuais , que là où ses Ministres le sont, combié nous deuons-nous esiouir de ce que le Ciel nous preseruant de ces deux inconueniës , nous a donné aujourd'huy vn Roy tres-vertueux , & encores assisté du mesme Conseil dont le GRAND HENRY son Pere s'est tousiours seruy?

Puis qu'il a donc pleu à Dieu, SIRE, de vous conseruer jusques à present , ces graues & venerables Vieillards pour vous aider maintenant comme Pilotes tres-expers à conduire le vaisseau de ceste Monarchie, nous ne doutons point que vous n'ayez l'oreille attentue-

ment ouuerte aux sages Confeils qu'ils vous donneront pour vous faire furgir à bon port. Si bien que ne faisant rien d'importât sans leur aduis, vous ne vous repentirez jamais de l'auoir fait. Ce feroit auffi chose tres dommageable au Prince, (disoit le Senateur Pompeianus) de demander conseil à qui ne le sçait pas donner, & encores pire, à qui ne l'ose dire, mais du tout mauuais de ne s'en sçauoir aider apres l'auoir receu. Or vostre Majesté ne se peut mal adresser pour le premier chef, veu la grande suffisance & capacité de ces dignes Personnages vieilliss au maniment des affaires de cest Estat, & pour le second vous estes doué d'un naturel si doux & si debonnaire, que vous prendrez toujours en bonne part l'honneste & respectueuse liberté de leur conseil,

là où il ira du salut de vos Peuples, & de la gloire & reputatiõ de vostre nom. Aussi les fideses Ministres d'un grand Roy, tel que la nature vous a fait naistre, doiuent tousiours plus parler à sa personne qu'à sa fortune, d'autant qu'il seroit trop malheureux, si par vne lasche complaisance ou timidité seruile ils ne luy osoient librement donner aduis de ce qui regarde le bien de ses affaires, dont l'ignorance luy causeroit quelquesfois des pertes irreparables. Et pour le troisieme poinct, qui regarde de se preualoir d'un bon conseil apres l'auoir receu, vostre mesme debonnaireté fera que vous en tirerez toute sorte de fruit: Mais tout ainsi, SIRE, qu'on dit que les Ægyptiens auoient ceste coustume que d'exposer leurs malades à la veüe du public, afin qu'un chacun

contribuaſt ce qu'il pourroit à leur guerifon : De meſme, expoſant les affaires du Royaume aux yeux des Princes de voſtre ſang, & des autres Grands que vous en eſtimerez dignes, tant Eccleſiaſtiques que Laiques, vous les admettrez en vos Conſeils, & vous ſeruirez de leurs aduis, afin d'autorizer dauantage les reſolutions qui ſeront priſes pour le bien de l'Eſtat. Car la reputation que ceſt ordre apportera dans les Prouinces, fera que vos peuples obeiront plus volontiers à ce qui aura eſté arreſté par vne ſi ſolemnelle deliberation. Ioinct qu'il y aura toujours moins de murmure & de jolouſie entre les plus notables de vos ſubiects ſ'ils ſe voyent honorez de la creâce que voſtre Maieſté aura en eux ; chacun ſe reſſentant comme obligé à

l'exécution des conseils où il aura participé, la mauuaise coustume de plusieurs de nostre nation, estât de censurer volôtiers la resolution des choses où ils n'ont pas esté appelez. Ce corps ainsi composé de tât de celebres personnages rendra vostre Majesté tant plus Auguste, laquelle embrassant aussi les conseils de la vraye prudence, exposera ses actions au jour, & rejetant toute sorte de cauilation, comme indigne d'un grand Roy, ne fera rien qu'à découuert, & qu'elle ne vueille que tout le monde sçache. Non pas SIRE, qu'il n'y ait de certains mysteres au gouuernement d'une grande Monarchie, qui desirent le secret & le silence, & qui pour n'estre esuëtez, ne doiuent pas estre proposez ny resolus en un conseil ouuert, desquels neant-

moins tout homme sage & discret ne doit auoir la curiosité de s'enquerir plus auant que de ce qu'on luy en doit communiquer. C'est là où la prudence de vostre Majesté sçaura apporter le temperamment qu'elle jugera estre plus à propos, donnant sur tout ceste impression à ses peuples, qu'elle agit de soy mesme, & que de plusieurs conseils, soient publics ou particuliers, elle sçait toujours eslire & suiure le meilleur, sans les espouser par faueur ou par passion, celuy des vieux estant vrayement preferable à celuy des jeunes & moins experimentez.

Comme vn grand Prince disoit donc, qu'il aimeroit autant faire “  
vne œuure digne de reprehension “  
deuant les Dieux, que de soustenir “  
vne mauuaise opinion deuant Vl- “

„ pian ce sage Iurifconsulte: De'mes-  
me vostre Majestè , cedant au fi-  
delle conseil de ses bons seruiteurs,  
ne se roidira jamais à faire cho-  
se d'importance contre leur aduis  
& jugement. Ce n'estoit pas aussi  
sans sujet que Cesar s'estonnoit de  
ce qu'Alexandre disoit , qu'il ne  
„ sçauoit plus que faire, apres auoir  
„ conquis la plus grande partye du  
„ monde, comme s'il y auoit moins à  
„ faire à bien regir & gouuerner vn  
„ Royaume, qu'à l'acquérir. C'est  
pourquoy, SIRE, vous seruant de  
toutes pieces pour vous acquitter  
tant plus dignement d'une charge  
si pesante que celle que vous avez  
sur les bras, les bons liures vous  
peuvent encores seruir de fidelles  
Conseillers: car ils vous instruiront  
sans eraincte ny cajolerie quelcõ-  
que, vous representât au naif qu'el-

le est la gloire des Princes vertueux, & quelle est le blasme de ceux qui s'abandonnent au vice. Prenant plaisir de vous les faire lire, & de vous en entretenir quelquesfois, cela vous inspirera insensiblement vne certaine pointe & generosité qui eschauffera vostre courage à imiter toutes les glorieuses actions de tant de Heros que l'histoire celebre, ne plus ne moins que le mesme Cesar disoit, qu'il estoit touché du seul portraict d'Alexandre. Apprés doctrine des *Eccl. ch. 6.* ta ieunesse ( dit l'Escripture ) & tu  
trouueras sagesse, qui te durera ius-  
ques à ce que tu ayes les cheueux  
blancs. Si tu aimes d'ouïr, tu re-  
ceuras prudence. Si tu enclines ton  
oreille, tu seras sage. Aimant ainsi  
les bons liures, ceux qui font profession des lettres seront en estime

aupres de vostre Majesté, laquelle sera en nos iours le vray Restaurateur des Vniuersités, que les Rois ses Predecesseurs ont fondées pour l'vtilité & pour l'ornement du Royaume, parce que la ruine & la decadence n'en seroit pas moins honteuse à leurs successeurs, que la fondation leur en a esté glorieuse.

Avec la Religion, la Iustice & les lettres, le Prince se rend encores plus redoutable, s'il aime les armes, s'il recueille fauorablement les gens de ce mestier, & qu'ayant de quoy s'opposer à ses ennemis on perde l'enuie de l'attaquer, toute paix desarmée estât volontiers foible. Vostre Majesté est yssuë d'un Pere trop valeureux pour auoir besoin d'estre excitée à ceste grandeur de courage, puis que les forts engendrent des forts, les Aigles des

Aigles, & non des colombes craintives. Semblable donc à ce grand Mars, vous porterez la foudre à la main, vous entreprendrez sur vos ennemis, vous vous deffendrez s'ils vous assaillent, & departirez les charges de la guerre à vos subiects, non tant pour le respect de leur naissance, qu'en consideration de leur propre valeur. Et comme le mesme Empereur qui ordonna des triomphes pour honorer les victorieux, fist aussi des loix pour chastier honteusement les pusillanimes: De mesme vostre Majesté recognoissant le merite & le guer-

don pour freres, elle reputera aussi l'offense & la peine pour sœurs, c'est à dire, qu'il y aura en son Royaume de la recompense pour les braues, comme aussi du chastiment pour les lasches & perf-

des. Pour comble de benediction vous ferez que Dieu & les hommes soient tousiours tesmoins de la Iustice de vos armes. Car pour conseruer (disoit le grand Scipion) la  
„ paix dans vn Estat, il ne faut rien  
„ faire d'iniuste, ny rien souffrir de  
„ honteux. Et parcé que la victoire mesme des guerres ciuiles est dom-  
mageable aux Princes, vous ne les  
entreprendrez iamais qu'à toute  
extremité, & que l'honneur de  
Dieu & le salut de vos peuples op-  
primez, ne vous y force plustost  
que vostre interest particulier.

Les finances & le tresor du Prince estant encores vne des baze-  
ses principales sur qui repose l'E-  
stat, le fond en doit estre si bien  
mesnagé qu'il ne tarisse iamais, veu  
qu'un Prince necessiteux est moins  
craint de ses subiects & beaucoup  
moins

moins redouté de ses voisins, tant peut sur les vns & sur les autres l'opinion qu'ils conçoient de sa puissance. Or comme on donne volontiers le commandement des armes aux plus vaillans, aussi n'y aura il que les plus loyaux qui ayent l'administration de vos Finances, de peur qu'en cuidant faire espargne vous ne fussiez des-robé. Non que pour amasser beaucoup d'or & d'argent on doive humer le sang & deuorer la substance des peuples, ains les traictent doucement, on en est beny de la voix du public, & les graces du Ciel se multiplient sur le chef du Prince, qui semblable au berger se contente de la toison de ses brebis, sans les escorcher & en prendre la chair & la peau. C'est ce qui faisoit dire à vn vray Pere du peuple, qu'il gouuernerait

„la Republique de telle façon, qu'il  
„apprendroit que c'est le bien du  
„public & non pas le sien. Aussi les  
„subiects (au iugement de l'Empe-  
„reur Pertinax) refusent quelques-  
„fois de payer les tributs iustes & ac-  
„coustumez quand on les charge  
„d'impôts excessifs. Vous espargne-  
rez donc, SIRE, non en rauissant  
le bien d'autrui, mais en n'espan-  
chant vos Finances en dons im-  
mensés, ny en luxe, ny en depenses  
superfluës. Car estre contrainct  
d'arracher aux vns pour donner  
aux autres, ce ne seroit pas liberali-  
té, ains ceste vertu changeant de  
nom, elle s'appelleroit iniustice.

ET d'autant, SIRE, qu'on esti-  
me les Roys estre volontiers tels  
que sont ceux qui les approchent,  
vostre Majesté ne donnera accez  
ne credit aupres d'elle, qu'à ceux

qui sont vrayement gents d'honneur, ayment mieux le parler libre d'un homme sage & discret, que le discours emmiellé des flateurs, lesquels ne disent jamais au Prince ce qu'il est, mais beaucoup plus de ce qu'il n'est pas. Si bien que complaisans à l'oreille de leur Maistre, ils ne l'entretiennent que de ce qui luy agrée, ne touchent ses imperfections que pour les chatouïller, & le desguisant à soy-mesme, luy transforment ses vices en vertus, sa lascheté en clemence, son impudicité en galanterie. Bref ils luy preschent que ses paroles sont des oracles, & l'esleuant jusques au troisieme Ciel, luy font accroire qu'il est, non Officier, mais compagnon de Dieu. Fuyez donc, SIRE, fuyez la rencontre de telles gents, comme celle du Basilic qui tue de son seul

regard, & que ce soit au tefmoignage interieur de vofre conſcience que vous ſçachiez au vray ce que vous eſtes, ou ce que vous n'eſtes pas, imitant ceſte Vierge ( que dit Pline ) laquelle ſe regardant en vn miroir , voulut tirer ſon portraict de ſa propre main , pour fuyr la flatterie du Peintre.

La cour du Prince ayant à ſervir d'exemple de pudicité à tout le Royaume, vofre Maieſté ſe commandera ſoy-mefme , ne plus ne moins qu'elle commande ſes peuples, & eſtimera eſtre choſe digne d'un Prince vertueux de ne s'aſſervir aux voluptez des ſens , ains elle les domptera mieux que ſes propres ſubiects, ne preſumant point que tous doiuent viure reglément, & qu'il ſoit loifible à elle ſeule de ſ'abandonner aux plaiſirs illicites,

lesquels on ne sçauroit mieux vaincre qu'en les fuyant, comme l'on dit des Scites qui combattent leurs ennemis en se reculant.

La faueur du Prince estant desirée de tous, vous la departirez avec tant de discretion, que faisant du bien & de l'honneur aux vns, vous ostiez aux autres toute occasion de jalousie & de mescontentemēt. Si bien que viuant en Pere commun de vos subiects, vous distribuerez les charges du Royaume, non tant par la recommandation & au gré d'autrui, que par la propre cognoissance que vostre Majesté desirera auoir du merite de chaque particulier. Car ceste autorité Royale sera d'autant plus absolue que nul ne receura du bien que de la seule main de son Roy. Autorité SIRE, dont vous deuez

sur tout estre jaloux, comme estant le liçt des Vestales , & la couche sans macule , qui ne souffre jamais de compagnon , n'estant pas d'elle comme du partage de Polux , qui se contenta de n'estre que demy-Dieu , pour admettre son frere à la jouïssance de son immortalité. Aussi la France est vn corps qui ne respire & n'a vigueur que par vn seul esprit , ne plus ne moins que tout l'vniuers n'est illuminé que d'vn seul Soleil. Et comme Lysander se plaignoit au Roy Agesilaus, qu'il sçauoit fort bien abaisser ses  
» amis : Ouy bien ( luy respondit-il )  
» ceux qui veulent estre plus grands  
» que moy : De mesme vostre Majesté sçaura humilier ceux qui s'e orgueilliront , & qui voudront estre plus qu'ils ne doiuent , comme au contraire , elle exaltera ceux qui

humbles & debonnaires se contiendront en deuoir. Temperant ainsi voz faueurs, vous ne tomberez jamais en l'inconuenient que la sœur de l'Empereur Commodus luy reprochoit, disant, que de simple Esclaue il auoit fait Cleander Seigneur : Mais que de Seigneur il estoit deuenu luy-mesme Esclaue, pour l'excez de la grandeur où il l'auoit esleué, & laquelle en fin luy fut si suspecte, qu'il ne la peut abbatre qu'en luy ostant la vie.

Considérez aussi (comme le Serenissime Roy de la grande Bretagne representoit à son Fils) que la vertu accompagne le plus souuent la noblesse du sang, & que la dignité des Ancestres nous oblige à respecter ceux qui en sont yssus. Pourtant, honorez les Seigneurs & Gentils-hommes qui reuerent vo-

*Au pres.  
royal. 2.  
part.*

„ ſtre perſonne, & qui obeiffent à  
„ vos Loix, parce qu'ils ſont comme  
„ les Peres de la Patrie. Plus voſtre  
„ Cour ſera remplye de telles gents,  
„ plus y aurez-vous d'honneur, les  
„ employans meſmes en vos affaires  
„ plus importantes. Auffi ſont-ils les  
„ bras & les mains avec leſquelles  
„ vous executez vos Loix & iuſtes  
„ volontez. Soyez donc gracieux à  
„ qui vous obeira, & rigoureux à qui  
„ fera le contraire, afin que meſme  
„ les plus Grands viennent à croire,  
„ que leur plus-haut poinct d'hon-  
„ neur eſt à l'enuy des petits de reſpe-  
„ cter voſtre perſonne, & d'obeyr à  
„ vos commandemens, faiſant ſon-  
„ ner à leurs oreilles, que le premier  
„ ſeruice que vous deſirez d'eux, eſt  
„ que non ſeulement ils vous rendēt  
„ ceſte obeiffance; mais qu'ils la fa-  
„ cent auffi rendre par les moindres,  
„ & que

& que sans cela leur seruice ne “  
vous peut estre agreable. Ce mes- “  
me grand Roy desireux de conser- “  
uer la Noblesse de ses Royaumes, &  
pour empescher qu'elle ne respan-  
de son sang dans des querelles par-  
ticulieres, ne se deuant immoler  
que pour le salut de l'Estat, disoit  
encor à son cher Fils, ce que vostre  
Majesté sçaura, Dieu aydant, ac-  
complir heureusement : Ne ces- *ibid.*  
sez je vous prie, que vous n'ayez “  
osté & destruiet ces malheureux “  
duels & deffis, afin que l'effect en “  
soit aboly, & le nō mesme oublié. “

Avec le support que le Prince  
tire de la force & bien-ueillance de  
ses subiects, encores a il besoin de  
s'appuyer au dehors. Les alliances  
que fera donc vostre Maiesté, se-  
ront fortes & puissantes, parce que  
de s'vnir & confederer avec des

personnes foibles, ce seroit seulement chercher avec qui se perdre. Et pour cōseruer l'amitié des Princes que vous jugerez dignes de vostre alliance, procédez toujours ingenuëment avec eux. Car cōme on  
,, disoit du bon Traian, qu'un Prince  
,, peut bien estre hay, encores qu'il  
,, ne vueille mal à personne : Mais,  
,, que d'estre aimé il ne le peut estre  
,, si luy-mesme n'ayme : Ainsi n'attendez de vos Alliez rien de net, & d'affranchy, sinon qu'autant qu'ils se ressentiront obligez de vous rendre le change de l'amitié que vous leur tesmoignerez en l'accomplissement des traittez, & des promesses où vous aurez engagé vostre foy. Foy, dy-je, qui fait honorer ou mespriser le Prince. Car l'observant religieusement, fust ce mesme à son dommage, il en est en

perpetuelle bonne odeur, comme au contraire l'infraction luy en est grandement honteuse. Et pource que vos peuples benissent Dieu de voir aujourd'huy ceste couronne alliée d'une double alliance avec l'Espagne, il est à esperer que des gages si precieux donnez de part & d'autre, seront autant de liens sacrez pour maintenir leur amitié inuiolable, & pour conseruer ces deux grandes Monarchies en perpetuelle concorde, afin que comme leur desunion a causé si long temps des pertes irreparables à la Religion & à l'Estat, leur bonne intelligence soit maintenant au support & à l'appuy de tous les deux. Non que pour cela vostre Majesté doie moins s'entretenir avec ses autres Alliez, ains les ayant pour amis & procurât tousiours par voyes

justes, que le fort n'opprime le foible, la France se glorifiera du mesme bon-heur que Themistocles dōnoit à la terre qu'il vouloit vendre, disant (pour la bien louer) qu'elle auoit bon voisin.

Finalelement, SIRE, encores que vous soyez par dessus toutes les Loix humaines, & que ce ne soit à vos subiects de controller vos actions, si n'estes-vous pas dispensé des Loix diuines qui vous obligent à bien & droitement regner. C'est pourquoy si vous embrassez les vertus que j'ay osé vous représenter en ce discours, & que vous preniez la sincerité de mon affection en bonne part, vos peuples se transformeront selon l'innocence de vostre vie, tout ainsi qu'on voit qu'il y a de certaines plantes qui se tournēt au mouuement du Soleil:

Et encores que vous ayez tant plus de peine à bien regir, que vous estes successeur d'un bon Prince: si est-ce que viuât ainsi, nous esperõs que vous ne cederez au Grãd Henry vostre Pere: Vous serez beny de Dieu, sa main puissante fera le soutien de vostre Sceptre, ses Anges celestes seront à l'entour de vous, comme vne forte legion destinée à la garde de vostre Majesté: Mais parce qu'il est impossible de bien regner sans la vraye Sapience, vous la demanderez à Dieu, & luy direz avec le plus sage Roy qui a jamais esté au mōde. Enuoye la des Cieux & du siege de ta gloire, afin qu'estât avec moy, elle s'employe à trauailler, & que je sçache ce qui est agreable deuant toy. Car elle sçait & entend toutes choses, & me conduira sagement en mes faiçts, & me gar-

*Sapiens.  
cap. 9.*

“

“

“

“

“

“

„ dera par sa puissance, de sorte que  
„ mes œuures seront bien receuës, &  
„ gouuerneray justement ton Peu-  
„ ple, & me rendray digne du Trône  
„ de mes Peres.

F I N.



